



Kutunza Sabato

Mimi ni Bwana, Mungu wenu; endeni katika amri zangu, mkazishike hukumu zangu, na kuzitenda. Zitakaseni Sabato zangu; zitakuwa ishara kati ya mimi na ninyi, mpate kujua ya kuwa mimi ndimi Bwana, Mungu wenu.—Ezekieli 20:19, 20.

Wakati wa Kutoka Misri, asasi ya Sabato ilifanywa kujulikana sana mbele ya watu wa Mungu. Wakati walipokuwa bado wako utumwani, wasimamizi wao wa kazi walijaribu kuwalazimisha kufanya kazi katika siku ya Sabato kwa kuongeza kiasi cha kazi kilichohitajika kila juma....

Kule Sinai sheria ilinenwa; na nakala yake, juu ya mbao mbili za mawe, “zilizoandikwa kwa chanda cha Mungu” ilitolewa kwa Musa (Kutoka 31:18). Na kupitia miaka karibu ya arubaini ya kutangatanga Waisraeli walikumbushwa mara kwa mara juu ya siku ya kupumzika aliyoipanga Mungu, kwa kuzuia mana katika kila siku ya saba na uhifadhi wa kimiujiza wa sehemu mara mbili zilizoanguka katika siku ya maandalio.

Kabla ya kuingia katika Nchi ya Ahadi, Waisraeli walionywa na Musa “Ishike siku ya Sabato uitakase” (Kumbukumbu 5:12). Bwana alikuwa amepanga kwamba kwa utunzaji wa uaminifu wa amri ya Sabato, Israeli wangekumbushwa kila siku juu ya uwajibikaji wao Kwake kama Mwumbaji wao na Mkombozi wao. Kama wangeitunza Sabato katika roho inayofaa, ibada ya sanamu isingeweza kuwapo; lakini iwapo madai ya sheria hii ya Amri Kumi yakiwekwa kando kama yasiyokuwa ya lazima kutiwa tena, Muumba angesahaulika na watu wangeliabudu miungu mingine.

“Naliwapa sabato zangu,” Mungu alisema, “ziwe ishara kati ya mimi na wao, wapate kujua ya kuwa mimi, Bwana, ndimi niwatakasaye.” Lakini bado “walizikataa hukumu zangu, wala hawakuenda katika amri zangu, wakazitia unajisi sabato zangu, kwa maana mioyo yao iliandama vinyago vyao.” Na katika wito Wake wa kuwataka warudi Kwake, Aliwaelekeza upya juu ya umuhimu wa kuitunza Sabato kuwa takatifu. “Mimi ni Bwana, Mungu wenu,” alisema; “endeni katika amri zangu, mkazishike hukumu zangu, na kuzitenda; zitakaseni sabato zangu; zitakuwa ishara kati ya mimi na ninyi, mpate kujua ya kuwa mimi ndimi Bwana, Mungu wenu” (Ezekieli 20:12, 16, 19, 20)....

Kristo, wakati wa huduma Yake hapa duniani, alisisitiza madai ya Sabato ambayo ni lazima kufuatwa; katika mafundisho Yake yote alionesha heshima kwa asasi ambayo Yeye Mwenyewe alikuwa ameitoa. Katika siku zake Sabato ilikuwa imepotoshwa sana kiasi kwamba utunzaji wake uliakisi tabia ya watu wenye ubinafsi na wadhalimu badala ya tabia ya Mungu. Kristo aliweka kando mafundisho ya uongo ambayo kwayo wale waliodai kumjua Mungu walimwasilisha visivyo. Ingawa alifuatwa na uadui usio na huruma wa marabi, Yeye wala hakuelekea kuyakubali masharti yao, bali alisonga mbele moja kwa moja akiitunza Sabato kulingana na sheria ya Mungu (Manabii na Wafalme. Sehemu ya 1, uk. 153–155).